

大般若波羅蜜多經卷第五百四十八夜八

唐三藏法師玄奘奉詔譯

第四分譬喻品第十四

爾時具壽善現復白佛言世尊甚深般若波羅蜜多實為大事現世間不佛告善現如是

夜八

如是甚深般若波羅蜜多實為大事出現世間所以者何甚深般若波羅蜜多實能成辦一切智智實能成辦諸獨覺地實能成辦諸聲聞地善現當知如刹帝利灌頂大王威德自在降伏一切以諸國事付囑大臣端拱無為安隱快樂諸佛亦爾為大法王威德自在降伏一切以諸佛法若獨覺法若聲聞法悉皆付囑甚深般若波羅蜜多普令成辦是故善現甚深般若波羅蜜多實為大事出現世間善現當知甚深般若波羅蜜多不為攝受

執着色故出現世間不為攝受執着受想行識故出現世間不為攝受執着預流果故出現世間不為攝受執着一來不還阿羅漢果故出現世間不為攝受執着獨覺菩提故出現世間亦不為攝受執着一切智智故出現世間具壽善現即白佛言云何如是甚深般若波羅蜜多亦不為攝受執着一切智智故出現世間佛告善現於意云何汝頗見有阿羅漢果可攝受執着不善現答言不也世尊我不見有阿羅漢果可於其中攝受執着佛告善現善哉善哉我亦不見有如來法可於其中攝受執着是故善現甚深般若波羅蜜多亦不為攝受執着一切智智故出現世間具壽善現復白佛言若甚深般若波羅蜜多亦不為攝受執着一切智智故出現世間者

新學大乘諸菩薩衆聞如是說心便驚怖不能信受若因圓滿曾於過去無量佛所發弘誓願長夜積集殊勝善根諸菩薩衆聞如是說乃能信受佛告善現如是如是如汝所說由此因緣甚深般若波羅蜜多不應輒爲新學大乘諸菩薩說爾時欲界色界_二天子俱白佛言如是般若波羅蜜多最爲甚深難見難覺極難信解若諸有情曾於過去無量佛所發弘誓願多種善根事多善友乃能信解甚深般若波羅蜜多假使三千大千世界諸有情類一切皆成隨信行等彼有情類若經一劫若一劫餘修自地行不如有人一日於此甚深般若波羅蜜多忍樂思惟稱量觀察所獲功德勝彼無量爾時佛告諸天子言如是如是如汝所說天子當知若善男子善女人

等聞深般若波羅蜜多疾得涅槃勝前所說隨信行等若經一劫若一劫餘修自地行況忍樂等時諸天子聞佛所說歡喜踊躍頂禮世尊右遶三匝辭佛還宮去會未遠忽然不現隨所屬界各住本宮勸進諸天修殊勝行爾時善現復白佛言若菩薩摩訶薩聞深般若波羅蜜多能生信解不沉不沒不悶無惑無疑無取無執歡喜聽受恭敬供養從何處沒來生此間佛告善現若菩薩摩訶薩聞深般若波羅蜜多能生信解不沉不沒不悶_三不悶無惑無疑無取無執歡喜聽受恭敬供養樂見樂聞受持讀誦常不遠離甚深般若波羅蜜多及彼相應殊勝作意愛樂隨逐能說法者如犢隨母未嘗暫離乃至未得甚深般若波羅蜜多所有義趣究竟通利能爲

他說終不遠離甚深般若波羅蜜多及說法師經須臾頃是菩薩摩訶薩從人中沒來生此間乘宿勝因能成是事具壽善現復白佛言頗有成就如是功德諸菩薩摩訶薩供養承事他方佛已從彼處沒來生此間成就如是殊勝功德所以者何是菩薩摩訶薩先從他方無量佛所聞深般若波羅蜜多能生信解恭敬供養書寫受持請問其中甚深義趣修習思惟廣爲他說從彼處沒來生此間乘昔善根能辦是事復次善現有菩薩摩訶薩從觀史多天衆同分沒來生人中彼亦成就如是功德所以者何是菩薩摩訶薩先世已於觀史多天慈氏菩薩摩訶薩所聞深般若波羅蜜多能生信解

恭敬供養請問其中甚深義趣修習思惟廣爲他說從彼處沒來生此間乘昔善根能辦是事復次善現有菩薩乘善男子等雖於前世得聞般若波羅蜜多而不請問甚深義趣今生人中聞說如是甚深般若波羅蜜多其心迷悶疑惑沉沒或生異解難可開悟所以者何不了義者心多迷悶疑惑沉沒復次善現有菩薩乘善男子等雖於前世得聞般若波羅蜜多亦曾請問甚深義趣或經一日二日三日四日五日而不精進如說修行今生人中聞說如是甚深般若波羅蜜多雖經少時其心堅固無能壞者若離所聞甚深般若波羅蜜多及說法師請問深義尋便退失心生猶豫所以者何此菩薩乘善男子等雖於前世得聞般若波羅蜜多亦能請問甚深義

趣而不精進如說修行故於今生於深般若
波羅蜜多或時樂聞或時不樂或時堅固或
時退失其心輕動進退非恒如堵羅綿隨風
飄轉當知如是住菩薩乘善男子等新學大
乘雖有信心而不堅淨於深般若波羅蜜多
不能長時信樂隨轉彼於二地或隨墮一所
謂聲聞及獨覺地善現當知如泛大海所乘
船破其中諸人若不取木器物浮囊板片死
屍為依附者定知溺死不至彼岸若能取木
器物浮囊板片死屍為所依附當知是類終
不沒死得至安隱大海彼岸無損無害受諸
快樂住菩薩乘善男子等亦復如是有於大
乘雖成少分信敬愛樂而不攝受甚深般若
波羅蜜多為所依附當知彼類中道退沒不
能證得一切智智謂隨聲聞或獨覺地若於

夜八

五

大乘有信有忍有樂有欲有精進有勝解有
不放逸有勝意樂有捨有敬有欣有喜有清
淨心有於無上正等菩提不捨善軀復能攝
受甚深般若波羅蜜多為所依附當知此類
終不中道退入聲聞或獨覺地定證無上正
等菩提能盡未來利樂一切復次善現如有
男子或諸女人執持坏餅詣河取水若池若
井若泉若渠當知此餅不久爛壞何以故是
餅未熟不堪盛水終歸地故如是善現有菩
薩乘善男子等雖於大乘有信有忍有樂有
欲有精進有勝解有不放逸有勝意樂有捨
有敬有欣有喜有清淨心有於無上正等菩
提不捨善軀而不攝受甚深般若波羅蜜多
方便善巧當知彼類中道退沒不能證得一
切智智謂隨聲聞或獨覺地復次善現如有

男子或諸女人持燒熟瓶詣河取水若池若井若泉若渠當知此瓶終不爛壞何以故是瓶善熟堪任盛水極堅牢故如是善現有菩薩乘善男子等若於大乘有信有忍廣說乃至有於無上正等菩提不捨善軛復能攝受甚深般若波羅蜜多方便善巧當知此類終不中道退入聲聞或獨覺地定證無上正等菩提能盡未來利樂一切復次善現如有商人無善巧智船在海岸未固修營即持財物安置其上牽入水中速便進發當知是船中道壞没人船財物各散異處如是商人無善巧智喪失身命及諸財寶如是善現有菩薩乘善男子等雖於大乘有信有忍廣說乃至有於無上正等菩提不捨善軛而不攝受甚深般若波羅蜜多方便善巧當知彼類中道

夜八

退沒不能證得一切智智謂墮聲聞或獨覺地復次善現如有商人有善巧智先在海岸固修船已方牽入水知無穿穴後持財物置上而去當知是船必不壞没人物安隱達所至處如是善現有菩薩乘善男子等若於大乘有信有忍廣說乃至有於無上正等菩提不捨善軛復能攝受甚深般若波羅蜜多方便善巧中間法爾不墮聲聞及獨覺地必證無上正等菩提與諸有情常作饒益復次善現譬如有人年百二十老耄衰朽復加衆病所謂

風病熱病痰病或三雜病於意云何是老病人頗從牀座自能起不善現對曰不也世尊佛告善現是人設有扶令起立亦無力行一俱盧舍或二或三何以故極老病故如是善現有菩薩乘善男子等設於大乘有信有忍

夜八

七

廣說乃至有於無上正等菩提不捨善軛若不攝受甚深般若波羅蜜多方便善巧當知彼類不證無上正等菩提退墮聲聞或獨覺地何以故遠離般若波羅蜜多方便善巧法應爾故復次善現譬如有人年百二十老耄衰朽復加衆病謂風熱痰或三雜病是老病人欲從床座起往他處而自不能有二健人各扶一腋徐策令起而告之言莫有所難隨意欲往我等兩人終不相棄必達所趣安隱無損如是善現有菩薩乘善男子等若於大

乘有信有忍廣說乃至有於無上正等菩提不捨善軛復能攝受甚深般若波羅蜜多方便善巧當知此類終不中道退墮聲聞或獨覺地定證無上正等菩提轉妙法輪度有情衆

第四分天讚品第十五

爾時具壽善現便白佛言世尊新學大乘諸菩薩摩訶薩云何應住甚深般若波羅蜜多云何應學甚深般若波羅蜜多佛告善現新學大乘諸菩薩摩訶薩欲住欲學甚深般若波羅蜜多先應親近承事供養真淨善友若能宣說甚深般若波羅蜜多教授教誡諸菩薩者當知是爲真淨善友謂能宣說甚深般若波羅蜜多教授教誡新學大乘諸菩薩言來善男子汝應勤修布施淨戒安忍精進靜

慮般若波羅蜜多汝勤修時應無所得而為
方便與諸有情平等共有迴向無上正等菩
提汝迴向時勿以色故而取無上正等菩提
勿以受想行識故而取無上正等菩提何以
故善男子若無所取便能證得一切智智汝
善男子於聲聞地及獨覺地勿生貪著如是
善現真淨善友教授教誡新學大乘諸菩薩
摩訶薩令其漸入甚深般若波羅蜜多爾時
善現復白佛言諸菩薩摩訶薩能為難事依
如是相布施淨戒安忍精進靜慮般若波羅
蜜多發趣無上正等菩提不欲自在而取滅
度觀極重苦諸有情界求證無上正等菩提
欲盡未來方便拔濟而不怖畏生死流轉佛
告善現如是如是諸菩薩摩訶薩能為難事
謂為利樂諸世間故發趣無上正等菩提哀

愍世間諸有情故發趣無上正等菩提作是
誓言我為濟拔諸世間故為諸世間作舍宅
故為諸世間作歸依故為示世間究竟道故
為諸世間作洲渚故為諸世間作光明故為
諸世間作導首故為諸世間作所趣故發勤
精進趣向無上正等菩提云何菩薩摩訶薩
作是誓言我為濟拔諸世間故發勤精進趣
向無上正等菩提善現菩薩摩訶薩見諸世
間流轉生死受種種苦不能出離為斷彼苦
發勤精進趣向無上正等菩提是為菩薩摩
訶薩作是誓言我為濟拔諸世間故發勤精
進趣向無上正等菩提云何菩薩摩訶薩為
諸世間作舍宅故發勤精進趣向無上正等
菩提善現菩薩摩訶薩欲為世間說一切法
皆不和合發勤精進趣向無上正等菩提是

爲菩薩摩訶薩爲諸世間作舍宅故發勤精進趣向無上正等菩提具壽善現白言世尊云何一切法皆不和合佛告善現諸色不和合即色不相屬若色不相屬即色無生滅若色無生滅即色不和合受想行識亦復如是諸菩薩摩訶薩欲爲世間說一切法皆有如是不和合相發勤精進趣向無上正等菩提云何菩薩摩訶薩爲諸世間作歸依故發勤精進趣向無上正等菩提善現菩薩摩訶薩爲令一切生老病死愁歎憂苦所逼世間速得解脫生等衆苦入無餘依般涅槃界發勤精進趣向無上正等菩提是爲菩薩摩訶薩爲諸世間作歸依故發勤精進趣向無上正等菩提云何菩薩摩訶薩爲示世間究竟道故發勤精進趣向無上正等菩提善現菩薩

摩訶薩欲爲世間說如是法謂色彼岸即非色如彼岸色亦爾受想行識彼岸即非受想行識如彼岸受想行識亦爾如色受想行識彼岸一切法亦爾具壽善現白言世尊若如色受想行識彼岸一切法亦爾者豈不菩薩摩訶薩於一切法已現等覺所以者何此中都無分別事故佛告善現如是如是於彼岸中無所分別無分別故諸菩薩摩訶薩於一切法已現等覺善現當知諸菩薩摩訶薩甚爲難事雖能如是觀一切法而不作證亦不夜八沉沒作是念言我於此法現等覺已證得無十上正等菩提爲諸世間宣說開示是爲菩薩摩訶薩爲示世間究竟道故發勤精進趣向無上正等菩提云何菩薩摩訶薩爲諸世間作洲渚故發勤精進趣向無上正等菩提善

現譬如大小海河池中高地可居周迴水斷說為洲渚如是善現色乃至識前後際斷由此斷故一切法斷此一切法前後際斷即是寂滅微妙涅槃亦是如實無顛倒性善現菩薩摩訶薩求證無上正等菩提欲為有情說如是法令速趣入如是涅槃是為菩薩摩訶薩為諸世間作洲渚故發動精進趣向無上正等菩提云何菩薩摩訶薩為諸世間作光明故發動精進趣向無上正等菩提善現菩薩摩訶薩為破長夜無明卵殼所覆有情重黑闇故為療有情無知翳目令明朗故為與一切愚冥有情作慧明故發動精進趣向無上正等菩提是為菩薩摩訶薩為諸世間作光明故發動精進趣向無上正等菩提云何菩薩摩訶薩為諸世間作導首故發動精進

夜八

十一

趣向無上正等菩提善現菩薩摩訶薩欲為世間宣說開示諸色本性無生無滅欲為世間宣說開示受想行識本性無生無滅欲為世間宣說開示諸異生法本性無生無滅欲為世間宣說開示聲聞獨覺菩薩佛法本性無生無滅欲為世間宣說開示一切法本性無生無滅發動精進趣向無上正等菩提是為菩薩摩訶薩為諸世間作導首故發動精進趣向無上正等菩提云何菩薩摩訶薩為諸世間作所趣故發動精進趣向無上正等菩提善現菩薩摩訶薩欲為世間宣說開示色以虛空為所趣受想行識亦以虛空為所趣一切法皆以虛空為所趣欲為世間宣說開示色無所趣與虛空等受想行識亦無所趣與虛空等一切法皆無所趣與虛空等如

太虛空無來無去無作無住無所安立無生
無滅諸法亦爾皆如虛空無分別故無所分
別何以故諸色空故無來無去受想行識空
故亦無來無去一切法空故皆無來無去所
以者何一切法皆以空無相無願爲趣彼於
是趣不可超越一切法皆以無造無作爲趣
彼於是趣不可超越一切法皆以無生無起
爲趣彼於是趣不可超越一切法皆以無性
爲趣彼於是趣不可超越一切法皆以如夢
爲趣彼於是趣不可超越一切法皆以無我
爲趣彼於是趣不可超越一切法皆以無邊
爲趣彼於是趣不可超越一切法皆以寂滅
涅槃無取無捨無來無去最極寂滅爲趣彼
於是趣不可超越諸菩薩摩訶薩欲爲世間
說如是法發勤精進趣向無上正等菩提是

卷八

十二

爲菩薩摩訶薩爲諸世間作所趣故發勤精
進趣向無上正等菩提爾時善現便白佛言
誰於如是甚深般若波羅蜜多能生信解佛
告善現若菩薩摩訶薩久修菩薩摩訶薩行
已曾供養無量諸佛於諸佛所發弘誓願所
種善根皆已純熟無量善友攝受護念乃於
如是甚深般若波羅蜜多能生信解具壽善
現復白佛言若於如是甚深般若波羅蜜多
能生信解是菩薩摩訶薩以何爲自性佛告
善現是菩薩摩訶薩以調伏遠離爲自性具
壽善現復白佛言是菩薩摩訶薩當何所趣
佛告善現是菩薩摩訶薩當趣一切智智具
壽善現復白佛言若菩薩摩訶薩趣一切智
智者能覺是趣亦能宣說亦與有情作所歸
趣佛告善現如是如是如汝所說若菩薩摩

訶薩趣一切智智者能覺是趣亦能宣說亦與有情作所歸趣具壽善現復白佛言是菩薩摩訶薩能為難事謂著如是堅固甲冑我當度脫無量無數無邊有情令入涅槃而諸有情都不可得佛告善現如是如是如汝所說復次善現是菩薩摩訶薩所著甲冑不屬色不為色不屬受想行識不為受想行識不屬聲聞獨覺地不為聲聞獨覺地不屬菩薩地不為菩薩地不屬佛地不為佛地所以者何以一切法皆無所屬皆無所為諸菩薩摩訶薩行深般若波羅蜜多能著如是堅固甲冑具壽善現復白佛言若菩薩摩訶薩能著如是堅固甲冑行深般若波羅蜜多即於三處無所住著何等為三一聲聞地二獨覺地三如來地佛告善現汝觀何義作如是說善

夜八

十三

現答言甚深般若波羅蜜多無所住著無能修者無所修法無修時處亦無由此而得修習所以者何非此般若波羅蜜多甚深義中而有少分實法可得名能修等世尊若修虛空是修般若波羅蜜多若修一切法是修般若波羅蜜多若修無所著是修般若波羅蜜多若修無所有是修般若波羅蜜多若修無攝受是修般若波羅蜜多若修除遣法是修般若波羅蜜多佛告善現如是如是如汝所說復次善現應依如是甚深般若波羅蜜多最勝行住觀察不退轉菩薩摩訶薩若菩薩摩訶薩雖行如是甚深般若波羅蜜多而於如是甚深般若波羅蜜多無所執著當知是為不退轉菩薩摩訶薩復次善現諸有不退轉菩薩摩訶薩不執他語及他教勅以為真

要非但信他而有所作聞說如是甚深般若
波羅蜜多其心不驚不恐不怖不沉不沒無
疑無悔亦不迷悶於深般若波羅蜜多歡喜
樂聞深信受書持讀誦如理思惟為他演
說常無厭倦當知如是不退轉菩薩摩訶薩

夜八

十四

先世已聞甚深般若波羅蜜多所有義趣何
以故由此不退轉菩薩摩訶薩聞說如是甚
深般若波羅蜜多其心不驚不恐不怖廣說
乃至為他演說無厭倦故具壽善現便白佛
言若菩薩摩訶薩聞說如是甚深般若波羅
蜜多其心不驚不恐不怖廣說乃至為他演
說常無厭倦是菩薩摩訶薩云何修行甚深
般若波羅蜜多佛告善現是菩薩摩訶薩相
續隨順趣向臨入一切智智應作如是行深
般若波羅蜜多具壽善現復白佛言是菩薩

摩訶薩云何相續隨順趣向臨入一切智智
行深般若波羅蜜多佛告善現若菩薩摩訶
薩相續隨順趣向臨入虛空而行深般若波
羅蜜多是為菩薩摩訶薩相續隨順趣向臨
入一切智智行深般若波羅蜜多所以者何

以一切智智無量無邊若無量無邊即非色
亦非受想行識無得無現觀無證無道果無
智無識無生無滅無成無壞無起無盡無修
無作無所從來亦無所去無方無域亦無所
住唯可說為無量無邊善現當知虛空無量
無邊故一切智智亦無量無邊一切智智無
量無邊故無能證者非色能證亦非受想行
識能證非布施波羅蜜多能證亦非淨戒乃
至般若波羅蜜多能證所以者何色即是一
切智智受想行識即是一切智智布施波羅

夜八

十五之一

蜜多即是一切智智淨戒乃至般若波羅蜜
多即是一切智智時天帝釋將領欲界諸天
子衆大梵天王將領色界諸天子衆來詣佛
所頂禮雙足右遶三匝却住一面合掌恭敬
俱白佛言如是般若波羅蜜多最爲甚深難

夜八

十五之二

見難測爾時佛告諸天子言如是如是如汝
所說天子當知我觀此義初得無上正等覺
時宴坐思惟不樂說法心作是念我所證法
微妙甚深非諸世間卒能信受天子當知我
所證法即是般若波羅蜜多此法甚深非能
證非所證無證處無證時天子當知虛空甚
深故此法甚深我甚深故此法甚深一切法
無來無去故此法甚深一切法無量無邊故
此法甚深一切法無生無滅故此法甚深一
切法無染無淨故此法甚深時諸天子復白

佛言甚奇世尊希有善逝佛所說法微妙甚
深一切世間難信難解所以者何佛所說法
不爲攝受不爲棄捨世間有情多行攝受或
行棄捨是故世間於佛所說不能信解爾時
佛告諸天子言如是如是如汝所說

夜八

十六之一

第四分真如品第十六之一

爾時具壽善現便白佛言世尊佛所說法微
妙甚深於一切法皆能隨順無所障礙佛所
說法無障礙相與虛空等都無足跡佛所說
法無待對相無第二故佛所說法無與等相
無敵對故佛所說法都無足跡無生滅故佛
所說法都無蹊徑一切蹊徑不可得故佛所
說法都無蹊徑一切蹊徑不可得故佛所說
法都無戲論分別言說不可得故佛告善現
如是如是如汝所說爾時欲界色界天子便

夜八

十六之二

白佛言大德善現是真佛子隨如來生所以者何大德善現諸所說法一切皆與空相應故爾時善現告欲色界諸天子言汝等說我是真佛子隨如來生云何善現隨如來生謂隨如來真如生故一切生法不可得故所以者何如來真如無來無去本性不生善現真如亦無來去本性不生故說善現隨如來生如來真如即一切法真如一切法真如即如來真如如是真如無真如性亦無不真如性善現真如亦復如是故說善現隨如來生如來真如常住爲相善現真如亦復如是故說善現隨如來生如來真如無變異無分別遍諸法轉善現真如亦復如是故說善現隨如來生如來真如無所罣礙一切法真如亦無所罣礙若如來真如若一切法真如同一真

卷八

十七

如無二無別無造無作如是真如常真如相無時非真如相以常真如相無時非真如相故無二無別善現真如亦復如是故說善現隨如來生如來真如於一切法無憶念無分別善現真如亦復如是故說善現隨如來生如來真如無別異不可得善現真如亦復如是故說善現隨如來生如來真如不離一切法真如一切法真如不離如來真如如是真如常真如相無時非真如相善現真如亦復如是故說善現隨如來生雖說隨生而無所隨生以善現真如不異佛故如來真如非過去非未來非現在一切法真如亦非過去非未來非現在善現真如亦復如是故說善現隨如來生善現真如隨如來真如如來真如隨過去真如過去真如隨如來真如如來真

如隨未來真如未來真如隨如來真如如來
真如隨現在真如現在真如隨如來真如如
來真如隨三世真如三世真如隨如來真如
三世真如如來真如無二無別一切法真如
善現真如亦無二無別故說善現隨如來生
一切菩薩摩訶薩行真如即是諸佛無上正
等菩提真如諸菩薩摩訶薩由真如故證得
無上正等菩提說名如來應正等覺我於如
是諸法真如深生信解故說善現隨如來生
當說如是真如相時於此三千大千世界六
種變動如佛證得無上正等大菩提時等無
差別故說善現隨如來生天子當知然我善
現不由色故隨如來生不由受想行識故隨
如來生不由預流果故隨如來生不由一來
不還阿羅漢果故隨如來生不由獨覺菩提

卷八

十八

故隨如來生不由諸佛無上正等菩提故隨
如來生但由真如故隨如來生天子當知然
我善現不隨色生不隨受想行識生不隨預
流果生不隨一來不還阿羅漢果故生不隨
獨覺菩提生不隨諸佛無上正等菩提生但
隨真如生故我善現隨如來生爾時舍利子
白佛言世尊如是如是甚深微妙爾時佛告
舍利子言如是如是如汝所說如是真如甚
深微妙當說如是真如相時三百苾芻永盡
諸漏心得解脫成阿羅漢復有五百苾芻尼
衆遠塵離垢於諸法中得淨法眼五千天子
宿業成熟俱時證得無生法忍六十菩薩不
受諸漏心得解脫爾時佛告舍利子言今此
衆中六十菩薩已於過去五百佛所親近供
養雖修布施淨戒安忍精進靜慮而不攝受

甚深般若波羅蜜多方便善巧起別異相修別異行不入菩薩正性離生故於今時雖聞大法而宿因力不受諸漏心得解脫是故舍利子諸菩薩摩訶薩雖有菩薩道空無相無願而不攝受甚深般若波羅蜜多方便善巧

便證實際墮於聲聞或獨覺地夜八舍利子譬如

有鳥其身廣大百踰繕那或復二百乃至五百踰善那量翅羽未成或已衰朽是鳥從彼三十三天投身而下趣瞻部洲於其中路欸作是念我今還上三十三天於汝意云何是

鳥能還三十三天不舍利子曰不也世尊佛告舍利子是鳥中路或作是願至瞻部洲當令我身無損無苦於意云何是鳥所願可得遂不舍利子曰不也世尊是鳥至此瞻部洲時其身決定有損有苦或致命終或復近死

何以故是鳥身大從遠而墮翅羽未成或衰朽故佛告舍利子如是如是如汝所說有菩薩乘善男子等亦復如是雖發無上正等覺心已經殫伽沙數大劫勤修布施淨戒安忍精進靜慮亦修空無相無願解脫門而不攝受甚深般若波羅蜜多方便善巧便證實際遂墮聲聞或獨覺地舍利子是菩薩乘善男子等雖念三世諸佛世尊戒蘊定蘊慧蘊解脫蘊解脫知見蘊而心取相不知不見諸佛世尊如是五蘊真實功德但聞空聲取相執著迴向無上正等菩提便墮聲聞或獨覺地何以故舍利子是諸菩薩由不攝受甚深般若波羅蜜多方便善巧雖持種種所修善根迴向善提而無力故時舍利子便白佛言如我解佛所說義者若菩薩乘善男子等遠離

般若波羅蜜多方便善巧雖具無量福德資糧而於菩提或得不得是故菩薩摩訶薩衆欲得無上正等菩提決定不應遠離般若波羅蜜多方便善巧爾時佛告舍利子言如是如是如汝所說

卷八

二十

大般若波羅蜜多經卷第五百四十八

音釋

堵羅綿堵羅梵語也亦云兜羅此云細香花樹名也綿從樹生因而立稱
 軛音厄坏瓶坏鋪切坏鋪杯切坏鋪也
 耄音老腋音亦脇音左肘音右卵殼卵魯管切羽蟲所生爲卵殼克角切
 鳥音知療力弔切治也胄直又切兜登也蹊徑蹊強切徑路也徑切

吉定切翅施智切欸許勿切
 小道也翅翼也欸忽然也